



FOTO R. FEINER/52BESTEBAUTEN.CH

Ina punt radicala en la Val Nalps

■ (cp/fmr) La punt sur il Rein da Nalps vala sco ina da las pli radicalas punts en il Grischun. Dal 1957 è ella vegnida fabrigada en connex cun la construcziun da las ovras idraulicas dal Rein anteriur. Oz dat la punt access al mir da fermada en la Val Nalps. Ella surmunta ina chavorgia da 50 m larghezza e 30 m profunditad ed è conce-

pida cun furmas e lingias cleras ed extremamain reducidas, pli u main sin quatter «chommas sbrajattadas». Cun sia geometria precisa dat la punt d'in vial in cuntrarpunct a la cuntrada amorfa. Ella è vegnida concepida da l'inschigner turitgais Emil Schubiger (1903–1992). Sia proposta aveva gudagnà encunter projects da punts usita-

das dad artg. La punt da Nalps è in da 52 edificis che la Lia grischuna per la protecziun da la patria preschenta en il decurs da quest onn sin in'atgna pagina d'internet. L'idea da l'acziun, numnada «52 beste Bauten», è da preschentar edificis extraordinaris dals onns 1950–2000 e da sensibilisar il public per lur valor culturala.